



Komunikadu Imprensa
Parlamentu Nasionál
14 Agostu 2017

Desizaun Konsellu Administrasaun Parlamentár hodi halo leilaun ba kareta 65 ba deputadu sira iha Lejizlatura III konstitui konflitu interesse, la tuir lei no aumentu gastu ba orsamentu Estadu

Konsellu Administrasaun Parlamentár iha Parlamentu Nasionál halo leilaun ba kareta ho marka Prado hamutuk 65 ne'ebé sosa ho osan USD\$63.000/kareta ba deputadu 65 Lejizlatura III nian. Kareta 65 ne'e sei leilaun hosi deputadu 65 Lejizlatura III nian ne'ebé durante tinan 5 nia laran uza hela kareta sira ne'e. Konsellu ne'e determina folin ba leilaun ba kada kareta mak USD\$8.000.00.

“JSMP lamenta no kondena makaas desizaun ne'e, tanba konstitui konflitu interesse no la hatudu sentidu responsabilidade ba povu no estadu, liuliu tanba desizaun ne'ebé benefisia de'it deputadu sira rasik no la tuir lei”, dehan Diretór Ezekutivu JSMP, Luis de Oliveira Sampaio.

“Tuir lei, Konsellu Administrasaun Parlamentár la iha kompeténsia atu pronúnsia kona-ba alineasaun ba patrimóniu móvel sira Estadu nian, Diresaun Nasionál Patrimóniu Estadu mak iha kompeténsia atu deside kona-ba patrimoniun hira ne'e”, nia hatutan.

Iha Lei Nú. 15/2008 kona-ba Organizasaun no Funsionamentu Administrasaun Parlamentár nian fó autonomia patrimoniál ba Parlamentu Nasionál (Artigu 3 alinea 1). Ida-ne'e signifika katak Parlamentu Nasionál iha autonomia atu halo jestaun ba nia patrimónia sira, maibé la'ós kompeténsia ba Parlamentu Nasionál, partikularmente Konsellu Administrasaun atu deside kona-ba alineasaun ba patrimóniu móvel sira. Lei ne'e fó de'it kompeténsia atu pronúnsia kona-ba patrimóniu imobiliáriu (alinea d) hosi Art. 30).

Tuir loloos lei ne'e defini ho klaru ona kona-ba prosedimentu hira ne'e atu evita konflitu interesse ne'ebé mosu bainhira atu pronúnsia kona-ba alineasaun ba patrimóniu móvel sira, hanesan kareta ba membru deputadu sira, nsst. JSMP fiar katak iha prosesu ne'e poténsia konflitu interesse prevelese tanba membru Konsellu na'in 5 ne'ebé iha direitu ba votu ka foti desizaun mai hosi deputadu sira hosi bankada 5 ho númeru asentu parlamentár aas liu hosi bankada boot sira (Artigu 27 alinea b)). Membru Konsellu Parlamentár na'in 5 ne'ebé foti desizaun ne'e mós sai hanesan benefisiáriu ba sira-nia desizaun rasik. Ida-ne'e iha

Rua Beco Lakateu, Aldeia Manu fuik, Suku Colmera, Administrativu Vera Cruz

Dili Timor Leste

PoBox: 275 Telefone: 3323883 | 77295795

www.jsmp.tl info@jsmp.tl

Facebook: www.facebook.com/timorleste.jsmp

Twitter: @JSMPTl

pontensialidade boot atu foti desizaun ne'ebé favorável ba sira-nia an rasik no prátika hanesan ne'e mak hamosu konflitu interese.

Lei Nú. 15/2008 la fó kompeténsia ba Konsellu hodi pronúnsia kona-ba alineasaun ba patrimóniu móvel Parlamentu Nasionál nian. Nune'e, lei ne'e prevee keda ona katak bainhira Parlamentu Nasionál la iha provizaun espesiál ruma ka sei iha falta ka lakuna ruma iha rejime ne'ebé aplika ba Parlamentu Nasionál, sei aplika subsidiariamente rejime jerál ne'ebé vigora (Artigu 4 alineaia 1) & 2)).

Timor-Leste iha ona rejime jerál ida ne'ebé regula espesifikamente no detalladamente kona-ba alineasaun ba patrimóniu móvel sira Estadu nian mak Dekretu-Lei 32/2011 kona-ba Jestaun no Alineasaun ba Patrimóniu Móvel sira Estadu nian. Mezmuké Lei Nú. 15/2008 prevee kona-ba administrasaun ba alineasaun patrimóniu imobiliáriu, maibé la iha provizaun ne'ebé detallu kona-ba nia prosedimentu sira hanesan prevee iha Dekretu-Lei 32/2011 kona-ba alineasaun ba patrimóniu móvel sira. Ne'e signifika katak bainhira lei ida-ne'e rasik sei iha omisaun no ka lakuna kona-ba prosedimentu alineasaun patrimóniu imobiliáriu sira Parlamentu Nasionál nian. Parlamentu Nasionál bainhira halo alineasaun ba patrimóniu imobiliáriu sira presiza rejime jerál vijente relevante ba asuntu ne'e.

Hosi parte seluk, termu “leilaun” ne'ebé deputadu sira uza ne'e mós la loos no pertene. Leilaun la hanesan ho “konkursu” ne'ebé sei iha konkursu públiku no internu. Bainhira alineasaun ne'e liuhosi leilaun, tenke loke ba públiku, ne'ebé hanaran “*hasta públiku*” no determina de'it sasán ne'e nia “folin baze”. Bainhira iha ema ruma ne'ebé fó liu ida ne'e, nia mak iha direitu dahuluk atu sosa, la'ós taka ba membru deputadu 65 ho folin fiksi (definitivu) hanesan Konsellu Administrasaun Parlelamentár decide dadauk ne'e. Prosedimentu detallu kona-ba leilaun no konkursu prevee ho klaru no detallu iha Dekretu-Lei Nú. 15/2008.

Iha parte seluk, JSMP preokupa valór/montante ne'ebé Konsellu ne'e decide ba kada kareta ho USD\$8.000.00. Mezmuké iha fórmula ka métodu sira ne'ebé aplika universalmente hodi sura degrasasun valór sasán nian hanesan iha lian/dalen Indonézia nian temi: *Metode Penyusutan Garis Lurus, Metode Jumlah Angka Tahun no Metode Jumlah Saldo Menurun*.

JSMP konsidera métodu sira ne'e seidauk tempu atu bele adota no aplika iha Timor-Leste, liu-liu ba sasán sira ne'ebé pertense ba patrimónia Estadu nian. Realidade hatudu katak povu maioria sei moris iha ki'ak nia okos no ekonómia nasaun nian depende maka'as liu ba mina no gás ne'ebé la renovavel iha futuro. Bainhira Timor-Leste la jere nia rekursu sira ho di'ak no prudente no polítiku sira hakarak goza sasán no moris luxu ho gastu Estadu nian mak sei kria mós risku no dezastre ba jerasaun sira ne'ebé sei mai, bainhira mina no gás hotu ona.

Tanba ne'e, JSMP enkoraza polítiku sira, liu-liu membru deputadu sira iha sensibilidade ba ita nia realidade atual no atu iha espíritu servi ita ninia-povu no rai ne'e ho konsiénsia. Ne'e katak povu barak sei moris ki'ak, solidáriu katak sente mós povu nia terus no susar no prudente katak halo buat ne'ebé refléta interese ema hotu nian nune'e sei bele lori di'ak ba nasaun no povu tomak iha ohin no aban bainrua.

Bazeia ba razaun no komentáriu sira iha leten no mós haree ba kondisaun kareta sira ne'e sei dia'k hela, JSMP rekomenda atu Estadu, partikularmente deputadu sira Lejizlatura IV nian atu bele uza nafatin kareta sira ne'e ba tinan 5 mai. Bainhira sira kontinua uza kareta sira ne'e mak Estadu bele poupa ona orsamentu Estadu maismenus tokon USD\$2.925.000.00 ne'ebé Parlamentu deside atu sosa fali kareta foun ba deputadu foun sira ne'e. Se Estadu halo leilaun ba kareta 65 ne'e ho USD\$8.000.00 mak osan ne'ebé tama ba kofre Estadu hamutuk USD\$520.000.00 de'it. Tanba ne'e orsamentu ba gastu líkidu ba sosa kareta nian hamutuk tokon USD\$2.405.000.00 (2.925.000-520.000).

Atu hetan informasaun liutan halo favór kontaktu:

Luis de Oliveira Sampaio
Diretór Ezekutivu JSMP
Telefone: 3323883 | 77295795
E-mail: luis@jsmp.tl

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77295795
www.jsmp.tl
info@jsmp.tl
Facebook: www.facebook.com/timorleste.jsmp
Twitter: @JSMPtl